

DITAME

sobre o anteproxecto de
Lei de recoñecemento da universidade privada
Universidad Intercontinental de la Empresa



APROBADO POLO PLENO O 19 DE FEBREIRO



Todos os documentos do CES poden atoparse en

www.ces-galicia.org



Manuel Martínez Varela, secretario xeral do Consello Económico e Social de Galicia,

CERTIFICO:

que o Pleno do Consello Económico e Social de Galicia, en sesión celebrada o día 19 de febreiro de 2021, coa asistencia dos membros que de seguido se relacionan:

Presidente Agustín Hernández Fernández de Rojas

Secretario xeral Manuel Martínez Varela

GRUPO PRIMEIRO

CIG Miguel Malvido Cabirto
Susana Méndez Rodríguez
Héctor López de Castro
Natividade López Gromaz

UGT-Galicia José Carlos Rodríguez del Río
Beatriz Meilán del Río
José Luis Fernández Celis
Olga Crespo Sánchez

CC.OO. Maica Bouza Seoane
Juan Martínez García
Xesús Castro Baamonde
Carlos Pardo Pardo

GRUPO SEGUNDO

CEG Javier Martínez López
Antonio Fontenla Ramil
J. Ignacio López-Bachiller Fernández



Jaime Luis López Vázquez
David Martínez Alonso
Marisol Nóvoa Rodríguez
Jorge Cebreiros Arce
Ana Belén Vázquez Eibes
Cristina Rama Molinos
José Antonio Neira Cortés

GRUPO TERCEIRO

UU.AA.	Jacobo Feijóo Lamas Alba Torreira Puga
SLG	Marieta Pastoriza Martínez Xosé Pérez Rei
Confrarías	José Manuel Rosas Otero José Basilio Otero Rodríguez
Consumidores	Miguel López Crespo Josefa Monteagudo Romero
Economía social	María del Mar Pernas Márquez
Universidade da Coruña	Ángel S. Fernández Castro
Universidade Santiago C.	Edelmiro López Iglesias
Universidade de Vigo	José María Martín Moreno

acordou emitir o ditame que literalmente se transcribe de seguido:



ANTECEDENTES

1.- En data 28 de decembro de 2020 tivo entrada no Consello Económico e Social de Galicia (CES) oficio do presidente da Xunta de Galicia remitindo, para o seu preceptivo ditame, o anteproxecto de Lei de recoñecemento da universidade privada “Universidad Intercontinental de la Empresa”, con sede na Comunidade Autónoma de Galicia.

Este organismo resulta competente para o ditame deste anteproxecto de lei de acordo co previsto no artigo 5 da súa lei de creación (Lei 6/1995, de 28 de xuño). O devandito artigo establece entre as funcións que corresponden ao CES a de emitir ditames de carácter preceptivo ou facultativo, atopándose entre os primeiros aqueles que versen sobre “Anteproxectos de lei e proxectos de decretos legislativos e plans xerais ou sectoriais que regulen materias socioeconómicas directamente vinculadas ao desenvolvemento económico e social de Galicia. (...)”.

2.- O texto do anteproxecto foi remitido, en data de 29 de decembro, á presidencia e aos membros da Comisión Sectorial número 1, *Economía, emprego e sectores produtivos*, competente por razón da materia, para a elaboración da correspondente proposta de ditame, co fin de iniciar os traballos de estudo sobre a devandita proposta. Así mesmo, tal como establece o Regulamento de Réxime Interno do CES, deuse conta á Comisión Permanente da entrada da solicitude de ditame.

3.- O anteproxecto a ditaminar ven acompañado, entre outros documentos, da Memoria xustificativa e económica-financeira, do informe favorable definitivo de pertinencia socio-económica, o Informe da Asesoría Xurídica Xeral da Xunta de Galicia, do informe da Axencia para a Calidade do Sistema Universitario de Galicia (ACSUG), o informe de impacto de xénero, e o Informe de legalidade da Secretaría Xeral Técnica da Consellería promotora.



4.- A Comisión Sectorial, na súa sesión 3/21, de data 2 de febreiro, acordou aprobar a proposta de ditame e remitila á Presidencia do Consello para a súa tramitación.

5.- O presidente do CES, de acordo coa Comisión Permanente do organismo, convoca o Pleno do Consello, que na súa sesión 02/21, do 19 de febreiro, e tras coñecer o texto remitido, acorda aprobar o seguinte

DITAME

sobre o anteproxecto de Lei de recoñecemento da universidade privada “Universidad Intercontinental de la Empresa”, con sede na Comunidade Autónoma de Galicia.

ESTRUTURA E CONTIDO

A Exposición de motivos reflicte que o anteproxecto sometido a ditame ten por obxecto o recoñecemento da Universidade privada “Universidad Intercontinental de la Empresa”, cuxo obxectivo é constituírse en universidade privada de servizo público, especializada no eido da empresa e de carácter internacional, desenvolvendo unha actividade académica centrada en dúas áreas de coñecemento: ciencias sociais e xurídicas e enxeñaría e arquitectura.

Xunto á devandita exposición de motivos, o anteproxecto de lei consta de 8 artigos, dúas disposicións transitorias e dúas disposicións derradeiras.



CONSIDERACIÓNS XERAIS

1.- O acceso a unha educación de calidade inclusiva e equitativa, é un dereito fundamental que ten toda sociedade e actúa como garante e alicerce do seu progreso e avance. Como reflicte a UNESCO, a educación “permite a mobilidade socioeconómica ascendente e é clave para saír da pobreza”. No marco da Axenda 2030 sobre o Desenvolvemento Sostible, o obxectivo 4 denomínase “Garantir unha educación inclusiva, equitativa e de calidade e promover oportunidades de aprendizaxe ao longo de toda a vida para todos”.

No eido concreto do ensino superior, é importante que este se insire na realidade socioeconómica do seu territorio impulsando o seu desenvolvemento e os cambios necesarios do seu modelo produtivo. Debe por tanto asegurarse un nivel de financiamento que presente taxas de investimento acordes cos países desenvolvidos, así como dedicar unha gran parte da súa actividade e recursos á actividade investigadora, unindo a investigación e a docencia de excelencia.

2.- A creación dunha Universidade privada en Galicia está amparada tanto pola propia Constitución española, que no seu artigo 27 recoñece a liberdade de ensino e a liberdade das persoas físicas e xurídicas para crear centros docentes, así como polo Estatuto de autonomía de Galicia, que no seu artigo 31 determina a súa competencia plena sobre a regulación e administración do ensino en toda a súa extensión, niveis e graos, modalidades e especialidades.

Asemade, a Lei orgánica 6/2001, do 21 de decembro, de Universidades, e a Lei 6/2013, do 13 de xuño, do Sistema universitario de Galicia, regulan a posibilidade de creación ou recoñecemento de universidades privadas establecendo uns requisitos xerais e específicos que deben cumprir.

3.- Á vista da información presentada para a elaboración deste anteproxecto, o CES, sen entrar a facer un control de legalidade, non pode entrar a valoralo



positivamente e manifesta as súas reservas tanto polo feito de que no mesmo non se especifica cales son, en concreto as titulacións oficiais ofertadas, como por recoller a impartición dun grao por un instituto universitario, cando este último debe estar destinado a I+D+i segundo a regulamentación estatal e galega sobre os institutos universitarios.

- **Titulacións oficiais propostas**

A Comisión Galega de Informes, Avaliación, Certificación e Acreditación (CGIACA) é, de acordo cos estatutos da Axencia para a Calidade do Sistema Universitario de Galicia (ACSUG), o órgano superior de avaliación e ten atribuídas as funcións de emisión de informes, avaliación, certificación e acreditación que corresponden á ACSUG. A este respecto, o informe da ACSUG, baseado na valoración da CGIACA, indica que *“a teor da documentación presentada, non se cumpriría co disposto pola letra g) do artigo 13 da Lei 6/2013, de 13 de xuño, do Sistema Universitario de Galicia”*; o que contradí o afirmado no anteproxecto cando indica que *“co recoñecemento desta universidade amplíase a oferta formativa no eido da educación universitaria galega”*.

Alén do máis, o CES bota en falta o plan de desenvolvemento esixido polo artigo 6.2.a) do RD 420/2015 que debería ir acompañando ao Anteproxecto: *“Un plan de desenvolvemento de titulacións por cada rama de coñecemento que deberá comprender, ao menos, a relación das titulacións, a previsión do número total de prazas universitarias que se pretenden ofertar, curso a curso; o curso académico en que darán comezo as referidas actividades e o calendario para a implantación completa das ensinanzas e a posta en funcionamento dos correspondentes centros, así como os medios con que se conte especificamente para o seu desenvolvemento. Este plan deberá ser avaliado pola Axencia Nacional de Avaliación da Calidade e Acreditación (ANECA) ou, se for o caso, polo órgano de avaliación externa da comunidade autónoma en cuxo territorio se estableza a universidade”*.

- **Limitada función docente dos institutos universitarios**

As universidades privadas poden establecer novas figuras, distintas de centros e departamentos; pero a regulamentación estatal e galega sobre os institutos



universitarios abre a porta soamente á impartición de docencia en posgrao e doutoramento, non en relación cos títulos de grao. Segundo a Lei 6/2013, de 13 de xuño, do Sistema universitario de Galicia, os Institutos Universitarios son Centros ou unidades de I+D+i, exactamente igual que na normativa estatal.

A creación de institutos de investigación correspóndelle á comunidade autónoma, atendendo a criterios de excelencia científica, técnica ou artística e da súa conveniencia estratéxica para o desenvolvemento económico e social de Galicia; sen esquecer que, na avaliación dos institutos, forma unha parte fundamental o estudo do currículo investigador dos membros do mesmo.

Santiago de Compostela, 19 de febreiro de 2021

Vº e P.
O PRESIDENTE

O SECRETARIO XERAL

Agustín Hernández Fernández de Rojas

Manuel Martínez Varela



VOTOS PARTICULARES

**Voto particular das organizacións sindicais
CIG, UGT, CC.OO e SLG
ao ditame sobre o anteproxecto de Lei de
recoñecemento da universidade privada
“Universidad Intercontinental de la Empresa”.**

CONSIDERACIÓNS XERAIS

A sociedade galega precisa dunha universidade pública de calidade, como garantía e alicerce do seu progreso e avance, suficientemente apoiada pola Administración da que depende e, por extensión, da propia sociedade á que se debe e presta servizo.

A xestión do sistema educativo no seu conxunto require un tratamento eficiente e racional dos recursos. Para a consecución da súa imprescindible misión, as universidades deberían ter asegurado un plan de financiamento digno e razoable, aspirando a taxas de inversión acordes coas dos países desenvolvidos, que lles permitisen levar adiante a súa fundamental misión sen precariedade, e con mínimas garantías. Porén, o financiamento actual das nosas universidades públicas dista moito destes estándares internacionais.

Como dereito fundamental, como ben público, a educación non pode ser unha mercadoría porque isto atenta contra a igualdade de oportunidades. Aceptar unha universidade privada é aceptar a venda de títulos universitarios atendendo ao nivel económico, e non aos méritos e capacidades de cadaquén. Así, o dereito á educación superior -o acceso en igualdade de condición ao conxunto dos cidadáns e cidadás- só pode ser asegurado nas universidades públicas.

Precisamos un sistema educativo inserido na nosa realidade nacional para que dea resposta acaída ás necesidades da educación en Galiza, facilite o acceso



en igualdade de condicións ao conxunto dos cidadáns e cidadás, garanta un sistema educativo propio, destine os orzamentos necesarios á educación pública, remate coas subvencións ao ensino privado, e exerza todas as competencias en materia educativa.

A creación de coñecemento -a investigación-, a persecución da verdade, e a súa transmisión, só se poden dar nun entorno no que se garanta a Liberdade académica, e esta apóiase nos piares da autonomía universitaria -na que as inxerencias dos poderes económicos, políticos ou de calquera tipo non interfiren-, nas formas de autogoberno democráticas, e, último, pero non menos importante, na relación funcional do persoal docente e investigador. Todo o anterior, está recollido, no noso ordenamento xurídico, sendo unha realidade nas nosas universidades públicas. Parece moi difícil que a fundación que se presenta como dona do proxecto de universidade privada, poida garantir o dereito a liberdade académica, sen o que unha universidade non pode ser chamada tal.

Outro aspecto fundamental, é que a investigación non pode separarse da docencia de excelencia, e unha universidade non o é se non dedica una gran parte da súa actividade e recursos á a actividade investigadora, mentres, no proxecto de universidade privada, a investigación é unha actividade marxinal, o que mesmo se reflicte na planificación orzamentaria. A investigación, no proxecto, está concebida nunhas áreas moi concretas e restrinxidas, e non abranguen todas as -xa minguadas- áreas de coñecemento e campos científico-técnicos da docencia proxectada. Cuestión non menor, é que, ademais, parece moi difícil que o persoal poida dedicar tempo a investigación cunha carga docente de 400 horas.

Compárese o proxecto presentado cos chamados campus periféricos do SUG, onde a investigación e a docencia son moito máis ricas, abrangendo bastante máis que os 4 graos, 4 mestrados e dous doutoramentos, que como é obvio teñen unhas condición de moito menor esixencia orzamentaria para a súa posta en marcha e continuidade.



Chama a atención que, na planificación orzamentaria, os fondos destinados ás titulacións propias superan o orzamento da titulacións oficiais propostas. O proxecto non parece máis que unha escola de negocios que quere vender os seus cursos baixo o selo de calidade "Universidade".

Cómpre recordar, que nos últimos anos, son numerosas as revogacións que a Consellería acordou respecto á impartición de determinados graos e posgrados nas diferentes universidades públicas de Galiza. Aínda que cada caso terá a súa xustificación e circunstancias, a sombra que pende sobre estes casos é a falta de financiamento para poder manter a oferta investigadora e formativa cos medios existentes. A máis recente é a Orde de 22 de Decembro de 2020, publicada o 5 de Xaneiro de 2021, pero aconteceu o mesmo o 11 de Decembro de 2018 e 2019, o 19 de Decembro de 2017, on resulta unha política universitaria coherente a revogación de titulacións nas universidades públicas de Galiza para posteriormente xustificar a creación dunha universidade privada baseándose na escaseza ou eivas da oferta existente. Parece ser obxectivo do anteprojecto mesmo proclamar a insostenibilidade do público.

Finalmente, regresamos ao interese público para Galiza do proxecto de universidade privada, no que se debe basear e do que debe beber calquera proxecto de universidade, centro ou titulación do SUG. E notorio que as poucas titulacións ofertadas e a, aínda mais escasa, investigación proxectada só serven a un fin, para nada universal, e que para nada van permitir o desenvolvemento do noso país, e o cambio do modelo produtivo tan necesario en Galiza. A creación dunha nova universidade nos termos en que se propón non vén a cubrir ningunha carencia ou demanda existente senón que vai competir coas universidades públicas en ámbitos como o de administración e dirección de empresas, ou a enxeñería informática, cousa que non vai ser beneficiosa para o sistema universitario nin para o alumnado.

Todo o proxecto destila un fin, que é o de formar aos futuros traballadores e traballadoras do sector ou mesmo empresa que sustenta o proxecto ou entrar directamente a competir con titulacións xa ofertadas nos campus galegos e romper mesmo a colaboración que poida existir entre o tecido empresarial e



as tres universidades. É máis, a escasa investigación proposta diríxese a áreas moi concretas de interese para o sector bancario ou dun mercado perfil vinculado á institución que se beneficiaría coa autorización desta universidade. Non son para nada obxectivos universais, dirixidos ao progreso ou benestar das galegas e dos galegos.

As universidades, públicas ou privadas, son beneficiarias de fondos públicos, vía proxectos de investigación ou outras axudas. Isto significa que recursos públicos irán a parar a un proxecto que favorece a un sector, e mesmo a unha empresa privada moi concreta. A situación obxectiva é que Galiza non ten oco nin demanda para unha universidade privada, cando menos a día de hoxe.

As anteriores son razóns fundamentais polas que a institución non pode ser denominada universidade nin ter cabida no sistema universitario galego.

De se precisar, todas estas funcións poderían ser desenvolvidas á perfección polas tres universidades públicas existentes no SUG. Xa que as tres universidades e os seus sete campus ofrecen una cobertura formativa a todo o territorio, adaptándose ás necesidades sociais e laborais que se precisan, ampliando a súa oferta educativa e reorganizando aqueles aspectos cando é necesario. Polo que se deberá ampliar a oferta de novas titulacións nas universidades públicas.

Unha vez dito o anterior as organizacións asinantes queremos manifestar o noso rexeitamento á creación dunha Universidade Privada en Galiza que sería nefasta para os intereses públicos, para o Sistema Universitario Galego e para a poboación, xa que os servizos públicos son o único garante do cumprimento das misións do ensino superior e a investigación conferidas as universidades.

Santiago de Compostela, 19 de febreiro de 2021



**Voto particular que presenta a
Confederación de Empresarios de Galicia
ao ditame sobre o anteproxecto de Lei de
recoñecemento da universidade privada
“Universidad Intercontinental de la Empresa”.**

Os conselleiros do Grupo Segundo, integrado polos representantes da Confederación de Empresarios de Galicia, discrepan do contido do Ditame aprobado polo Consello Económico e Social de Galicia na sesión ordinaria do Pleno celebrada o 19 de febreiro de 2021 sobre o Anteproxecto de Lei ao non estar de acordo con certos puntos da redacción deste.

Concretamente, esta discrepancia refírese ao número 3 das consideracións xerais do texto do Ditame, que establece:

“(…)

3. Á vista da información presentada para a elaboración deste anteproxecto, o CES, sen entrar a facer un control de legalidade, non pode entrar a valoralo positivamente e manifesta as súas reservas tanto polo feito de que no mesmo non se especifica cales son, en concreto as titulacións oficiais ofertadas, como por recoller a impartición dun grao por un instituto universitario, cando este último debe estar destinado a I+D+i segundo a regulamentación estatal e galega sobre os institutos universitarios.

Titulacións oficiais propostas

A Comisión Galega de Informes, Avaliación, Certificación e Acreditación (CGIACA) é, de acordo cos estatutos da Axencia para a Calidade do Sistema Universitario de Galicia (ACSUG), o órgano superior de avaliación e ten atribuídas as funcións de emisión de informes, avaliación, certificación e acreditación que corresponden á ACSUG. A este respecto, o informe da ACSUG, baseado na valoración da CGIACA, indica que “a teor da documentación presentada, non se cumpriría co disposto pola letra g) do artigo 13 da Lei 6/2013, de 13 de xuño, do Sistema Universitario de Galicia”; o que contradí o afirmado no anteproxecto cando indica que “co recoñecemento desta universidade amplíase a oferta formativa no eido da educación universitaria galega”.

Alén do máis, o CES bota en falta o plan de desenvolvemento esixido polo artigo 6.2.a) do RD 420/2015 que debería ir acompañando ao Anteproxecto: “Un plan de desenvolvemento de titulacións por cada rama de coñecemento que deberá comprender, ao menos, a relación das titulacións, a previsión do número total de prazas universitarias que se pretenden ofertar, curso a curso; o curso académico en que darán comezo as referidas actividades e o calendario para a implantación completa das ensinanzas e a posta en funcionamento dos correspondentes centros, así como os medios con que se conte especificamente para o seu desenvolvemento. Este plan deberá ser avaliado pola Axencia Nacional de Avaliación da Calidade e Acreditación



(ANECA) ou, se for o caso, polo órgano de avaliación externa da comunidade autónoma en cuxo territorio se estableza a universidade”.

Limitada función docente dos institutos universitarios

As universidades privadas poden establecer novas figuras, distintas de centros e departamentos; pero a regulamentación estatal e galega sobre os institutos universitarios abre a porta soamente á impartición de docencia en posgrao e doutoramento, non en relación cos títulos de grao. Segundo a Lei 6/2013, de 13 de xuño, do Sistema universitario de Galicia, os Institutos Universitarios son Centros ou unidades de I+D+i, exactamente igual que na normativa estatal.

A creación de institutos de investigación correspóndelle á comunidade autónoma, atendendo a criterios de excelencia científica, técnica ou artística e da súa conveniencia estratéxica para o desenvolvemento económico e social de Galicia; sen esquecer que, na avaliación dos institutos, forma unha parte fundamental o estudo do currículo investigador dos membros do mesmo.”

Para os Conselleiros do Grupo Segundo, integrado polos representantes da CEG, a iniciativa de creación da nova universidade encádrase no dereito que a Constitución Española outorga ás persoas para a creación de centros de ensino, entre eles, centros de ámbito universitario nos termos que recolle a normativa estatal e autonómica vixente.

Precisamente a iniciativa obxecto do anteproxecto de lei, é coherente co devandito elenco normativo e cos requisitos e esixencias establecidas polas disposicións que a compoñen, como así concluíron nos informes que acompañan ao anteproxecto a Consellería de Cultura, Educación e Universidade, e o Ministerio de Universidades.

En particular, a iniciativa atende aos requisitos contidos no Real Decreto 420/2015, do 29 de maio, de creación, recoñecemento, autorización e acreditación de universidades e centros universitarios:

- a) Dispoñer dunha oferta académica mínima de titulacións oficiais
- b) Contar cunha programación investigadora adecuada.
- c) Dispoñer de persoal docente e investigador en número suficiente e coa adecuada cualificación.
- d) Dispoñer de instalacións, medios e recursos adecuados para o cumprimento das súas funcións.
- e) Contar cunha organización e estrutura adecuada.
- f) Garantir a prestación do servizo, así como o mantemento das súas actividades segundo o regulado polo artigo 9.
- g) Garantir que os seus Estatutos, réxime xurídico e Normas de organización e funcionamento sexan conformes ao establecido na Lei Orgánica 6/2001, do 21 de decembro, na normativa da comunidade autónoma respectiva e neste



real decreto. Cuestións todas elas atendidas pola proposta, así como o desenvolvemento dos devanditos requisitos que establece a Lei 6/2013, do 13 de xuño, do Sistema universitario de Galicia, especialmente nos seus artigo 13 e 14.

E con respecto ás reservas manifestadas (sobre tanto polo feito de que non se especifican en concreto as titulacións oficiais ofertadas, como por recoller a impartición dun grao por un instituto universitario, cando este último debe estar destinado a I+D+i segundo a regulamentación estatal e galega sobre os institutos universitarios), cabe sinalar o seguinte:

A valoración dos requisitos legais previstos son un trámite previo á confección do anteproxecto, sendo verificado o seu cumprimento tanto pola Consellería como o Ministerio de Universidades contando cos correspondentes informes preceptivos, incluídos o da propia ACSUG co ditame favorable da CGIACA. A UIE conta co informe favorable tanto do Consello Galego de Universidades como da Conferencia Xeral de Política Universitaria.

O artigo 13, letra g) da Lei 6/2013 do Sistema Universitario de Galicia, non debe entenderse como unha prohibición absoluta. A este respecto xa se pronunciou o Tribunal Constitucional, respecto a normativa da Comunidade Autónoma de Aragón. De considerarse unha prohibición absoluta, sería inconstitucional dado que produciría a limitación inxustificada do ámbito de autonomía constitucionalmente garantido ás universidades privadas que, xunto ás públicas, serven ao servizo público de educación superior.

En atención ao anterior, a Secretaría Xeral de Universidades, no seu “Informe de pertinencia socioeconómica” pronunciouse expresamente ao establecer que “trátase dunha oferta innovadora e especializada na empresa, a tecnoloxía e o emprendemento e non coincidente coas titulacións ofertadas no SUG, o que se valora especialmente pola súa aposta as novas ramas xurdidas non ámbito científico e consecuentemente ligadas ás novas necesidades profesionais do futuro” e indicar que “debido á alta especialización das titulacións ofertadas non obsérvase reiteración coas titulación preexistentes no SUG”.

A creación das titulacións definitivas, de acordo ás leis e normas de Galicia, non corresponden nin poden determinarse neste momento, senón, despois da aprobación da lei de creación da UIE, e baixo o control e supervisión, como se dixo, da Axencia Galega de calidade galega. A análise pormenorizada das titulacións corresponde á ACSUG e realizarase durante o proceso de acreditación e verificación destas. A Memoria da UIE presentouse en outubro de



2018. Dous anos e medio despois, o lóxico é que as mesmas sufran modificacións para adaptalas á evolución da ciencia, ás novas necesidades do mercado laboral e aos requirimentos que xorden durante o propio proceso de acreditación e verificación. As titulacións definitivas débense incluír na autorización para o inicio de actividades, previa a verificación destas pola ACSUG, e non no Anteproxecto.

E con respecto á limitada función docente dos institutos universitarios, cabe sinalar que estamos ante unha mera cuestión de denominación/nomenclatura dos centros baseada nunha interpretación literal do disposto na Lei Orgánica 6/2001.

En primeiro lugar, é necesario destacar que o art. 19 de lei 6/2013, do Sistema Universitario de Galicia, refírese aos Institutos Universitarios de Investigación, que son centros de I+D+i.

Na memoria para o recoñecemento da Universidade Intercontinental da Empresa (UIE), en ningún momento indícase que se impartirán titulacións de grao e de posgrao desde un centro destas características xa que se expón crear un único Instituto Universitario de Investigación e indícase expresamente que unicamente impartirá dous doutoramentos.

Na súa páxina 96, detállase que para impartir as titulacións a UIE contará co instituto Universitario de Administración de Empresas e Dereito e o Instituto Universitario de Enxeñería e Tecnoloxía Empresarial. Adicionalmente especificase no documento que é intención da UIE concentrar toda a súa actividade de investigación nun terceiro instituto que é o Instituto de Investigación que se expón crear para o efecto.

É dicir, os dous institutos que se quere empregar para impartir titulacións son de xeito evidente centros docentes que, conforme ao regulado no artigo 18 da Lei 6/2013, serán os encargados da organización dos ensinos e os procesos académicos, administrativos e de xestión conducentes á obtención dos títulos de grao e posgrao. A impartición das titulacións de grao e de posgrao realizárase neses dous centros docentes (un para cada rama de coñecemento), que adoptan a denominación de Instituto Universitario pero que en ningún caso terán carácter de centro de investigación.

Son unidades exclusivamente docentes con independencia da súa denominación. Por outra banda, hai que resaltar o que indica o mencionado artigo 18 no seu apartado 5, en relación ao acordo de creación de centros docentes:



“O acordo de creación contemplará os aspectos seguintes: a denominación, os centros, as institucións participantes e un informe sobre os recursos humanos, económicos e materiais necesarios para o desenvolvemento das súas actividades e, no seu caso, as condicións da participación das administracións públicas.”. Pois ben, o anteproxecto de Lei de recoñecemento da Universidade Intercontinental da Empresa dá cabida á creación dos centros docentes mencionados, baseado na información da propia memoria e nas normas de Organización e Funcionamento da UIE (artigo 4 Estrutura da Universidade), e todo iso conforme á lexislación vixente.

Por último e en canto ao que se indica no ditame referente a que “A creación de institutos de investigación correspóndelle á comunidade autónoma, atendendo a criterios de excelencia científica, técnica ou artística e dá súa conveniencia estratéxica para ou desenvolvemento económico e social de Galicia; sen esquecer que, na avaliación dous institutos, forma unha parte fundamental ou estudo do currículo investigador dous membros do mesmo” cabe resaltar que este parágrafo é unha reprodución case literal do artigo 19, parágrafo 4 da lei 6/2013 que regula especificamente a creación, modificación e supresión de centros de I+D+i . O mencionado artigo 19 o que regula é a creación dos Centros de Investigación, nos que, efectivamente, non se contempla que poidan impartir clases de grao, pero como xa se explicou anteriormente en ningún caso a proposta da Universidade Intercontinental da Empresa é impartir clases de grao nos centros de investigación.

Por conseguinte, os representantes do Grupo Segundo valoran que se cumpren os requisitos esixidos para o recoñecemento da nova Universidade, sendo positivo que esta veña a complementar a oferta do Sistema Público Universitario da nosa Comunidade Autónoma, en aras dunha maior competencia e especialización das persoas, tendo en consideración o seu ámbito específico de actuación centrado na área empresarial, tecnolóxica e de emprendemento, tan importante para o desenvolvemento social e económico de Galicia.

Polas razóns expostas, o Grupo Segundo non comparte os aspectos relacionados en este voto particular sobre o Ditame do Consello Económico e Social de Galicia ao Anteproxecto de Lei recoñecemento da universidade privada “Universidad Intercontinental de la Empresa”, con sede na Comunidade Autónoma de Galicia.

Santiago de Compostela, 19 de febreiro de 2021





www.ces-galicia.org

